
ФАРҒОНАДА МИНГГА ЯҚИН ХОТИН-ҚИЗЛАРГА ҲИМОЯ ОРДЕРИ РАСМИЙЛАШТИРИЛДИ

Вилоят ҳокимлигида гендер тенглигини таъминлаш ва хотин-қизлар ҳуқуқларини ҳимоя қилиш борасида амалга оширилаётган ишлар сарҳисобига бағишланган матбуот анжумани ўтказилди.

Таҳлил ва танқид руҳида ўтган очиқ мулоқотда хотин-қизлар мурожаатлари билан ишлаш, жиноятчиликнинг олдини олиш, ҳуқуқий саводхонлик тадбирлари самарадорлигини ошириш, маҳаллаларда ташкил этилган жамоатчилик кенгашлари фаолиятини яхшилаш ҳамда жамоатчилик назоратини кучайтириш зарурлигига эътибор қаратилди.

Таъкидлаб ўтилганидек, айти пайтда вилоят ҳокими раислигида хотин-қизлар гендер тенглигини ҳимоя қилиш бўйича 11 кишидан иборат вилоят комиссияси фаолият кўрсатмоқда. Вилоят ҳокимлиги, 19 та шаҳар-туман ҳокимликлари ҳузурда ҳамда 200 дан ортиқ корхона-ташкilotларда хотин-қизлар ва эркаклар учун тенг ҳуқуқ ҳамда имкониятларни таъминлаш масалалари бўйича маслаҳат кенгаши ташкил этилди.

Шу йилнинг ўтган даврида зўравонликка учраган 914 нафар аёлга ҳимоя ордери расмийлаштириб берилди. Натижада 260 та оила яраштирилди, 504 та оилавий низолар бартараф этилди ҳамда 3 нафар шахсга нисбатан маъмурий жавобгарлик чораси қўлланилди. 1052 нафар оғир шароитда яшаётган хотин-қизларнинг турмуш фаровонлигини яхшилаш чора-тадбирлари белгиланди. Тижорат банклари томонидан 1908 нафар тадбиркор аёлларнинг бизнес-лойиҳалари учун 72 млрд. 244 млн. сўм, хотин-қизлар ва оилани қўллаб-қувватлаш жамоат фонди томонидан эса 541 нафар хотин-қизларга 9 млрд. 583 млн. сўм миқдорда кредит ажратилди.

Ўзбекистон Республикаси Олий Мажлиси Сенати аъзоси Энахон Сиддиқова, вилоят маҳалла ва оилани қўллаб-қувватлаш бошқармаси бошлиғи Саидмурод Аминжонов, вилоят ҳокимининг хотин-қизлар масалалари бўйича маслаҳатчиси Дилноза Эргашева, бир қатор давлат ва жамоат ташкilotлари раҳбарлари ҳисоботлари бўйича савол-жавоблар ўтказилиб, келгусида ўзаро ҳамкорликда олиб борилиши зарур бўлган ишлар келишиб олинди.

Матбуот анжуманида республика ва маҳаллий ОАВ вакиллари ҳамда блогерларни қизиқтирган саволларга тегишли мутасадди идоралар раҳбарларининг жавоблари тингланди.

Фарғона вилояти ҳокимлиги

2020-11-14 14:40:52